

Script of Evening Gojri News Bulletin 09 October 2024 at 1700 Hrs

ایوننگ گو جری نیوز بلیٹن مو رخہ 09 اکتوبر 2024

یوہ آکا شوانی جموں ہے عبدالرحمن شاہین تے نصرت چودھری تیں خبر سُنو۔ پہلاں
خاص خاص خبر۔

- *1۔ جموں کشمیر تے ہریانہ واسطے اسمبلی انتخابات غی گنتی مکمل ہو گئی ہے۔ این سی 42 سیٹاں غے نال جموں کشمیر مانہ سب تیں بڑی پارٹی غا طور ور ابھری ہے۔ تے بی جے پی ہریانہ مانہ حکومت بنان واسطے پوری طرح تیار ہے۔
- *2۔ لیفٹنٹ گورنر منوج سنہا نے منتخب ممبران نانہ مبرا رکباد دتی تے اسمبلی انتخابات مانہ حصولین واسطے ووٹراں غی تعریف کی۔
- *3۔ عمر عبداللہ نے کہیو ہے کہ جموں کشمیر ریاست غی بحالی غو مطالبو کرن آلی قرار داد پہلی کابینہ میٹنگ مانہ منظور کی جائے گی۔
- *4۔ جموں کشمیر غا اعلیٰ چناؤ افسر نے ہموار انتخابات واسطے تمام تمام متعلقین غی مشترکہ کوششاں غی تعریف کی۔

خبران غی تفصیل نال پہلا عبدالرحمن شاہین۔

JK Counting Completes

جموں کشمیر تے ہریانہ مانہ اسمبلی انتخابات با رے ووٹاں غی گنتی مکمل ہو گئی ہے۔ جموں کشمیر مانہ تمام 90 اسمبلی نشستیں غا نتیجاں غو اعلان کر دتو گیو ہے۔ نیشنل کانفرنس نے 42 نشست حاصل کیں ہیں جدکہ اس غی اتحادی جماعت انڈین نیشنل کانگریس مانہ صرف 6 نشست ہی لبی ہیں۔ بھارتیہ جنتا پارٹی نے 29 نشست حاصل کیں ہیں۔ پی ڈی پی نے اس انتخاب مانہ صرف 3 نشست حاصل کیں ہیں۔ جد کہ سی پی آئی ایم تے عام آدمی پارٹی مانہ اک اک نشست لبی ہے۔ آزاد امیدواراں نے جموں کشمیر یوٹی مانہ 7 اس سیٹاں ور کامیابی حاصل کی ہے۔ نیشنل کانفرنس تے کانگریس اتحاد جموں کشمیر مانہ اگلی سرکار بنان با رے بالکل تیار ہیں۔ کیونجے ان نے 90 رکنی اسمبلی مانہ 48 نشست حاصل کر غے نصف ہندسہ مانہ پار کر ليو ہے۔ سابق وزیر اعلیٰ تے نیشنل کانفرنس غا رہنما عمر عبداللہ نے بڈگام تے گاندربل دوہاں حلقاں تیں کامیابی حاصل کی ہے۔ بندواڑہ مانہ جموں کشمیر پیپلز کانفرنس غا سجاد گنی لون نے جیت درج کی ہے۔ سی پی آئی ایم غا محمد یوسف تاریکامی نے کلگام اسمبلی حلقہ تیں جیت حاصل کی ہے۔ پی ڈی پی غی رہنما تے پارٹی سربراہ محبوبہ مفتی غی بیٹکی التجاء مفتی جنوبی کشمیر غا بجبہاڑہ نشست وروں اپنو انتخابی آغاز بار گئیں ہیں معروف نیشنل کانفرنس غا رہنما ناصر اسلم وانی کپواڑہ اسمبلی حلقہ تیں اپنی انتخابی لڑائی بار گیا ہیں۔ کانگریس جماعت غا دوئے کا رگزار صدر رمن بھلا تے تارا چند وی جموں جنوب تے چھمب تیں بالترتیب بار گیا ہیں۔ بی جے پی ریاستی صدر رویندر رینہ نو شہراہ حلقہ تیں اپنو چناؤ بار گیا ہیں۔ جموں کشمیر مانہ 90 اسمبلی حلقاں واسطے ووٹ 3 مرحلاں مانہ 18 ستمبر، 25 ستمبر تے رواں مہینہ غی 1 تا ریخ نانہ کھلیا گیا تھا۔ ہریانہ مانہ بی جے پی نے 90 اراکین مانہ اکثریت غو ہندوسو پار کر غے لگاتار تیجی وار سرکار بنانی برقرار رکھی ہے۔ بی جے پی نے ات 48 نشست حاصل کی ہیں جد کہ کانگریس 37 ور سمٹ گئی

3 نشست آزاد امید واران گا حصہ مانہہ آئی ہیں۔ انڈین نیشنل لوک دل نانہہ وی 2 نشست لہی ہیں۔

LG Congratulations

جموں کشمیر غا لیفٹنٹ گو رنر منوج سنہا نے اسمبلی انتخابات مانہہ پُر جوش شراکت بارے جموں کشمیر غا لوکاں گو شکریو ادا کیو ہے۔ انہاں نے جموں کشمیر مانہہ پُر امن، شفاف، آزادانہ تے منصفانہ اسمبلی انتخابات کروان با رے چناؤ عہدیداران، جموں کشمیر پولیس تے حفاظتی دستاں غی کوششاں نانہہ سراہیو ہے۔ اک سماجی ذرائع ابلاغ پوسٹ مانہہ لیفٹنٹ گو رنر نے دل سنگ قانون ساز اسمبلی واسطے چُنیا گیا ممبران تے چناؤ مانہہ نیشنل کا نفرنس غی سربراہی آلا اتحاد غی جیت ور انہاں نانہہ مبارکباد پیش کی ہے۔ اس پوسٹ مانہہ لیفٹنٹ گو رنر نے کہیو ہے جے وے دل غی عمیق گہرائیاں سنگ انہاں نانہہ مبارکباد پیش کر رہیا ہیں۔ تے لوکاں غی خدمات با رے انہاں نانہہ اپنی نیک خواہشات دے رہیا ہیں۔ انہاں نے کہیو جے آئین بند مہارا واسطے رہنما روشنی ہے تے وے یوہیکمنو چاویں جے سب اکھٹا مل غے لوکاں غی بہبود نانہہ یقینی بناویں۔ واضع رہ جے پُر امن انتخابی عمل تے لکھاں ووٹراں غی اس مانہہ شمولیت اک متحرک جمہوریت غی گواہی تے مُلک غی جمہوری قدراں ور لوکاں غا یقین نانہہ ظاہر کرے۔ اور اج جموں کشمیر نانہہ بہتر انتظامیہ، عوام اول، سماجی انصاف تے آپسی پہرائی چارہ با رے بڑی عزت غی نظر سنگ جانیو جا ئے۔

Women MLA

جموں کشمیر مرادانہ با اثر اسمبلی مانہہ نیشنل کا نفرنس تیں سابقہ وزیر سکینہ مسعود سمیت 3 خواتین نے چناؤ جیتو ہے۔ ان وچوں بھارتیہ جنتا پارٹی غی اکلوتی خاتون امیدوار شگون پریہار کشتواڑ اسمبلی حلقہ تیں جتی ہیں۔ جنہاں نے نیشنل کا نفرنس غا نامور لیڈر تے سابقہ وزیر سجاد احمد کچلو نانہہ ہرایو ہے۔ ضلع کلگام غا ڈی ایچ پورہ اسمبلی حلقہ تیں سکینہ مسعود نے 36 ہزار 6 سو 23 ووٹ حاصل کر غے 17 ہزار 4 سو 49 ووٹاں گا فرق سنگ گلزار احمد دار نانہہ ہرایو ہے۔ جنہاں نے بھارتیہ چناؤ کمیشن غی ویب سائٹ غے مطابق 19 ہزار 1 سو 74 ووٹ حاصل کیا۔ نیشنل کا نفرنس غی اک ہو ر امید وار شمیم فردوس نے ضلع سرینگر غا حبه کدل حلقہ تیں 9 ہزار 5 سو 38 ووٹاں غا فرق سنگ بی جے پی غا امید وار اشوک کمار بھٹ نانہہ ہرایو ہے۔ شمیم فردوس نے 12 ہزار 4 سو 37 ووٹ حاصل کیا ہیں سن 1977 تیں لے غے نیشنل کا نفرنس نے حبه کدل غی سیٹ ور 6 بار کامیابی حاصل کی ہے۔ تے شمیم فردوس اتوں 2008 تے 2014 مانہہ وی جیت غے اس حلقہ غی نمائندگی کر رہی ہیں۔ واضع رہ جے کشتواڑ تیں 29 بہراں غی شگون پریہار نے 29 ہزار 53 ووٹ حاصل کر تاں واں صرف 5 سو 21 غا تھوڑہ جیا فرق سنگ سجاد احمد کچلو نانہہ ہرایو ہے سجاد کچلو نے 28 ہزار 5 سو 32 ووٹ حاصل کیا ہیں۔ جھیڑا کہ اس توں پہلاں 2022 تے فر 2008 مانہہ اتوں جتیا تھا تے اُن غا والد اتوں 3 بار جتیا تھا۔ پی ڈی پی غا فردوس ٹاک نے صرف 9 سو 97 ووٹ حاصل کر غے اپنی ضمانت وی ضبط کرا لی۔

BJP Best Performance

بی جے پی نے جموں خطہ مانہہ 2014 غی 25 سیٹاں غا مقابلہ مانہہ 29 نشست جت غے اپنی ہُن تک غی بہترین کا رکردگی درج کی ہے۔ جد کہ کانگریس نے ہُن تک غی سب تین کھٹ سطح ور کامیابی حاصل کی ہے اور صرف راجوری غی اک نشست جت غے اپنو کھاتو کھولن مانہہ کامیاب رہی۔ واضع رہ جے پارٹی غا قد آور رہنما تے سابق نائب وزیر اعلیٰ تا را چند تے سابقہ وزیراں سمیت کئی دوجا سابق قانون سازاں نانہہ مذکورہ انتخابات مانہہ ہار غو سامنو کرنو پیو۔ بی جے پی نانہہ وی بڑو دھچکو لگو جد اس غا یوٹی غا سربراہ رویندر رینہ نے نو شہراہ غی نشست نیشنل کانفرنس غا رہنما سریندر چودھری کولوں ہاری۔ جموں خطہ مانہہ 43 نشستاں وچوں 29 سیٹاں ور بی جے پی نے جت غے سب تیں بڑی پارٹی بن غے اُبھری ہے۔ جد کہ نیشنل کانفرنس نانہہ 7 نشستاں ور جت حاصل ہوئی ہے۔ تیجا نمبر ور آزاد امید واراں نے میدا ن ماریو ہے۔ ارویندر کیجریوال غی عام آدمی پارٹی نے وی اپنو کھاتو مہراج ملک غے نال کھولیو ہے۔ جہیڑو ضلع ڈوڈہ تیں ضلع ترقیات کونسل غا ممبر غا طور ور جتیو تھو۔ کانگریس نانہہ صرف اک نشست لبی جد کہ غلام نبی آزاد غی ڈی پی اے پی، پی ڈی پی، بی ایس پی، پنتھر س پارٹی تے جموں کشمیر اپنی پارٹی جس نے خطہ مانہہ مَج سارا امید وار کھلا کیا تھا خالی رہیں۔

BJP SC ST

بی جے پی نے لگاتار دوجا اسمبلی انتخابات مانہہ درجہ فہرست ذاتاں با رے تمام مختص 7 سیٹاں ور کامیابی حاصل کی ہے۔ پر جموں خطہ مانہہ درجہ فہرست قبیلہ واسطے تمام مختص 6 نشستاں ور بار گئی ہے۔ اس نے حد بندی تیں بعد جموں خطہ مانہہ 6 وچوں 5 نوی بنائی گئی ممتاز مزارات غا ناں آلی تمام نشست حاصل کی ہیں۔ جموں کشمیر یوٹی مانہہ درجہ فہرست قبیلہ واسطے 9 نشست مختص کی گئی تھیں۔ جن مانہہ 6 خطہ جموں جد کہ 3 وادی کشمیر ہیں۔ اور درجہ فہرست ذاتاں واسطے تمام 7 نشست خطہ جموں مانہہ بی مختص کی گئی ہیں۔ بی جے پی نے اکھنور، مڑھ، بشناہ، سچیت گڑھ، رام گڑھ، کٹھوعہ تے رام نگر غی اسمبلی نشست خاصا ووٹاں سنگ جیتی ہیں۔ ور یوہ بی جے پی واسطے پورو اُلٹ تھو جس نے جموں خطہ مانہہ تمام درجہ فہرست قبیلہ واسطے مختص نشستاں راجوری، تہنہ منڈی، بدھل، مینڈھر، سرنکوٹ تے گلاب گڑھ تیں بار نصیب ہوئی۔ بی جے پی نے جموں خطہ مانہہ 6 وچوں 5 نوی نشست جتن مانہہ کامیابی حاصل کی ہے۔ جن مانہہ پاڈر، ڈوڈہ مغرب، ادھم پور مشرق، شری ماتا ویشنو دیوی کٹڑا، تے رام گڑھ شامل ہیں۔ بی جے پی نے مشہور مذہبی جگہ آلی 5 سیٹاں ور کامیابی حاصل کی جن مانہہ بی جے پی نے شری ماتا ویشنو دیوی کٹڑا سمیت ضلع ریاسی غی شیو کھوری، پاڈر ناگسینی غی مچیل ماتا، بلا ور غی سکرا لا ماتا، تے جسروٹہ غی جسروٹہ والی ماتا شامل ہیں۔

TA Soldier

حفاظتی دستاں غی طرفوں اج جموں کشمیر غا اننت ناگ ضلع تیں اک گمشدہ فوجی غی گولیاں سنگ چھلنی لاش برآمد کی گئی ہے۔ عہدیداراں غے مطابق ٹیرٹوریل فوج غا جوان ہلال احمد بھٹ جس غے بارے کل گمشدگی غی رپورٹ کی گئی تھی اُس غی لاش اننت ناگ غا اتراسو علاقہ گا سنگلان جنگلاتی علاقہ تیں برآمد کی گئی ہے۔ عہدیداراں غو کہنو ہے جے اُس غی لاش نانہہ طبی لوازمات با رے ہسپتال لیو گیو ہے۔ سرینگر مانہہ

فوج غی چنار کمانڈ غی طرفوں سماجی ذرائع ابلاغ ایکس ور پوسٹ مانہہ کہیو گیو ہے جے
 ٹیرتوریل آرمی غا اک فوجی جوان غا گم ہو جان غی رپورٹ تیں بعد بھارتیہ فوج غی طرفوں
 پولیس تے دوجی ایجنسیاں غے ہمراہ کو کرناگ غا کا ڈوان جنگلات مانہہ اک سانجھو
 انسداد دہشت گردی آپریشن چلايو گیو۔ جہیڑو کہ پوری رات چلتو رہیو۔

یہ خبر تم آکاشوانی جموں تیں سن رہیا ہیں خیراں غا باقی حصہ نال نصرت چودھری۔

NC India Alliance

نیشنل کانفرنس غا نائب صدر عمر عبداللہ نے کہیو ہے کہ انڈیا بلاک جموں کشمیر مانہہ
 سرکار بنان بارے دعوو صرف اس ویلے پیش کرے جو جد اتحادی جماعتاں غا اسمبلی
 مانہہ اتحاد غا رہنما غو انتخاب کرن غا سلسلہ مانہہ ملاقات وے گی۔ عمر دسیو جے نیشنل
 کانفرنس قانون ساز پارٹی جموں کشمیر غا وزیر اعلیٰ گا امید وار بارے فیصلو لے گی۔
 اُن نے کہیو کہ یوہ اتحاد اور منتخب اراکین غو فیصلو وے گو کہ اگلا 5 بہراں مانہہ
 جموں کشمیر غی قیادت کس غا ہتھ مانہہ دتی جائے گی۔ نیشنل کانفرنس غا رہنما نے
 کہیو جے منشور ثابت کرے کہ لوکاں نے جموں کشمیر مانہہ بی جے پی غی سیاست
 غے خلاف ووٹ دتو ہے۔ عمر عبداللہ نے کہیو کہ اس فیصلہ سنگ پارٹی غی ذمہ داری
 بدھ گئی ہیں۔ اُن نے پی ڈی پی غی صدر محبوبہ مفتی غو وی شکرپادا کیوجت اُن نے
 شاندار جت ورنیشنل کانفرنس مانہہ مبارکباد دتی۔

NC Statehood

نیشنل کانفرنس غا نائب صدر عمر عبداللہ نے اج کہیو ہے کہ این سی تے کانگریس
 حکومت اپنی پہلی کابینہ مانہہ جموں کشمیر غی ریاستی حیثیت غی بحالی ور زور دے گی۔
 میڈیا نال گل کرتاں واں عمر عبداللہ نے کہیو کہ انہاں مانہہ امید ہے کہ حکومت پنن تیں بعد
 کابینہ اک قرار دار پاس کرے گی۔ جس مانہہ مرکزی حکومت تیں جموں کشمیر غو ریاست
 غو درجو واپس دین واسطے کہیو جائے گو۔ انہاں نے مزید کہیو کہ اس قرار داد مانہہ فر
 وزیر اعظم کول لے جایو جائے گو۔ عمر عبداللہ نے یاہ وی امید ظاہر کی ہے کہ جموں
 کشمیر حکومت دہلی غے برعکس آسانی تیں چلے گی۔ انہاں نے کہیو کہ نوی دہلی غے نال
 لڑائی سنگ کجھ حاصل نہیں وے گو۔

CEO JK

جموں کشمیر عام اسمبلی انتخابات 2024 کامیابی نال اختتام پزیر ہو گیا ہیں جہیڑا کہ
 جموں کشمیر غا جمہوری عمل مانہہ اک اہم لمحو تھا۔ اعلیٰ چناؤ افسر پی کے پولے
 نے کہیو ہے کہ یہ جموں کشمیر مانہہ سال 2014 تیں بعد پہلا اسمبلی انتخابات تھا۔ جس
 مانہہ لوکاں غی طرفوں بدھ چڑھ غے حصولیو گیو۔ ووٹراں غی کثیر شراکت نے جمہو
 ریت غا اداراں ور لوکاں گا اعتماد غی دوبارہ تصدیق کی ہے۔ جس نے بیلٹ غی طاقت
 ور لوکاں غا مکمل یقین مانہہ واضع طور ور ظاہر کیو اور اس غی گواہی دتی۔ اعلیٰ
 چناؤ افسر نے تمام شراکتداراں غا سانجھا جتناں مانہہ سراپتاں واں ضلع چناؤ افسراں، 75
 ہزار تیں اپر پولینگ عملہ، کمانڈ تے کنٹرول روم غا عملہ، تمام سرگرمیاں گا نوڈل افسراں،
 حفاظتی اہلکاراں غا قابل ستائش کم ور شکرپادا کیو ہے۔ اُن نے ووٹراں غو وی
 شکرپادا کرتاں واں کہیو جے انتخابات نہ صرف معمول غی بحالی آئے پاسے اک قدم

غی علامت ہیں بلکہ اپنا جمہوری حقوق کا استعمال مانہ لوکاں غی صلاحیت غی وی
عکاسی کریں۔

اس غے نال ہی خبراں غو یوہ بلیٹن ختم ہوؤ۔